






史夢溪評點



漁洋詩話

上海會文堂書局印行



全書兩冊  
定價五角



吾師漁洋先生以詩道倡海內鏗憂韶濩振興元  
雅軀材樸學未易涉其流而溯其源然吾師樂與  
後進論詩凡詞苑傳誦詩話甚夥此一編最近出  
皆燕言紀舊之錄也卷中攷論述作悉皆根柢風  
騷牢籠百氏洞窺古人閫奧金鍼微點借爲世學  
指南間有別裁僞體駁正傳譌雖使前賢復起頗  
首心折者也於近今詞藝虛公品隲珠含玉韞一  
經洒發或擊賞全篇或斷章摘句直抉作者精要  
或有擷蘭除艾翻似意外奇獲者然後知名手出  
人心眼迥別也平生游歷幾徧天下鴻篇偉製固

已雄埒山川即至野店山郵荒陵斷塹短什飄蕭  
斜行黯淡暇時標舉一二真覺譌哭循生驚魂悅  
魄者矣然小子諷繹全編尤感于友朋兄弟之誼  
久而彌摯也吾師曩季三珠並負詩文重望日偕  
烏衣羣從切劘倡酬中邁棣萼雙凋風流歇絕鵠  
原追痛一編之中三致意焉詎止春草吟池秋風  
夜驛之感已乎詩朋執友皆極天下之選迄茲諸  
老徂謝而吾師靈光歸存酒闌鐙炮感慨舊遊頻  
復援述緒言申譯遺句則山丘華屋之思殆無以  
過也蚤歲爲風雅總持陶冶深至獎拔材穎有善



必甄片璧碎金胥歸巾笥尤極注意于寒素敲銅  
刻燭連袂接袵率多布衣窮賸顯幽振滯津津齒  
吻間夫郊島不遇昌黎則寒驢席帽埋沒羈貧久  
矣茲刻所載四方孤僻銷沈之彥實賴以傳不朽  
詎非詞門勝事哉琳不敏弗克演迤師傳竊於褰  
帷奉席飫聞風論今以斯編授梓且曰子爲我少  
述其旨槩退惟謏陋得挂名于卷帙之末有深幸  
焉是用勉綴詹言而窺見吾師忠厚悱惻之至意  
所以師表久倫嘉惠後進者約畧寓於斯編讀者  
亦可油然而興起也夫康熙庚寅九月北平門人

黃叔琳謹識

漁洋詩話三卷板藏蔣氏辛丑歲暮余同夫子亭  
雜錄并載以歸有客問余曰新城先生詩話盡此  
乎余曰否否此先生懷舊之深情也夫先生之詩  
大含細入無所不包寓內從遊者咸有觀海望衢  
之歎而迴風紫瀾不遺行潦數十年間銜華佩實  
之彥或紆金鏘玉或岩栖谷飲其零紈片羽有合  
于古人無不手自抄撮於是舊雨晨星驚風朝露  
感今追昔發潛聞幽是編所爲作也先生晚居長  
安位益尊詩益老每勤勤懃懃以教後學時于酒  
酣燭施興至神王輒從容言曰吾老矣還念平生



論詩凡屢變而交游中亦如日之隨影忽不知其轉移也少年初筮仕時惟務博綜該洽以求兼長文章江左煙月揚州人海花場比肩接迹入吾室者俱操唐音韵勝於才推爲祭酒然而空存昔夢何堪涉想中歲越三唐而事兩宋良由物情巖故筆意喜生耳目爲之頓新心思於焉避熟明知長慶以後已有濫觴而淳熙以前俱奉爲正的當其燕市逢人征途揖客爭相提倡遠近翕然宗之旣而清利流爲空踈新靈寢以佶屈顧瞻世道怒焉心憂于是以太音希聲藥淫哇錮習唐賢三昧之

選所謂乃造平淡時也然而境亦從茲老矣朋舊  
凋零吟情如覩吾敢湏臾忘哉噫知此言可以讀  
先生之詩卽可以讀先生詩話矣雍正乙巳八月  
海鹽俞兆晟書於澄江使院





余生平所爲詩話雜見於池北偶談居易錄皇華紀聞隴蜀餘聞香祖筆記魚子亭雜錄諸書者不下數百條而五代詩話又別爲一書今南中所刻昭代叢書有漁洋詩話一卷乃摘取五言詩七言詩凡例非詩話也康熙乙酉余旣遂歸田武林吳寶厓

陳琰

書來云欲撰

本朝詩話徵余所著無暇

刺取諸書乃以余平生與兄弟友朋論詩及一時談諧之語可記憶者雜書之得六十條南郵行急脫藁即以付之不復竄改戊子秋冬間又增一百六十餘條大兒啓涑好收余詩文尺牘草藁遂付

衰潢余年來目昏不能書此藁藏之家塾畱示子  
孫可耳不足示他人也漁洋老人阮亭甫書

蒙溪姓史名承  
豫字衍存至元

乾隆間詩人

編其評也

孝友至是詩

人推其石亭史家

侯石亭詩清遠

閑欲希踪至希

而家臣則少焉

中不并偉清者

板障不為其詞

采神顏石亭

或去之運至家

多歲書手自

評校後歸題焉

漁洋詩話卷上

濟南王貽上

余兄弟少讀書東堂嘗雪夜置酒酒半約共和王

裴輞川集東亭士得句云日落空山中但聞發樵

響兄弟皆為閣筆東亭與宋荔裳嚴武伯熊葉

元禮舒諸名士游吳興道場山共賦五言詩兄詩

先成羣公歎絕以為微雲澹河漢之比計甫草

曰三王竝負盛名西樵阮亭蚤達故聲譽易起乃

東亭之才詎肯作蠶署哉東亭舉庚戌進士早歿

余刻其詩二卷曰古盃集



茅墨如新身  
後以爲卷雪  
散山陰周君梅  
生前至是已購  
以七編者光片羽  
後其寶之六之  
見家漢學問之  
凡矣

荆溪雜書

兄考功士祿作憶萊子雜詩二十篇有潮勢汨三韓  
之句或疑汨字所出湮編修琬曰杜詩吳楚東南  
坼坼字汨字正以獨造爲奇

叔子

士祿

幼穎悟一日廣坐中客有舉焦竑字弱侯

爲問者皆曰當亦魏相字弱翁之義叔子方十二  
歲從末座起曰非也此出考工記輪人竑其輻廣  
以爲之弱也一座驚異

此則与詩話無涉可刪

余少時在廣陵每公事暇輒召賓客汎舟紅橋與  
袁荊州于令諸詞人賦詩有綠楊城郭是揚州之句  
江淮間取作畫圖又與林茂之張祖望杜于皇孫

豹人程穆倩脩禊於此自賦冶春詩二十首陳其  
年題其後云官舫銀鐙賦冶春琅邪風調更誰倫  
玉山筵上頽唐甚意氣公然籠罩人宗定九元鼎詩  
云休從白傅歌楊柳莫向劉郎演竹枝五日東風  
十日雨江樓齊唱冶春詞劉公猷曰耀明珠蔭桂  
旗麗矣或率而見拜或矯而當熊或揚袂隨風如  
欲仙去遺世獨立橫絕一時不必如老鐵花游諸  
曲遁作別調始見姿媚也

余徃如臯馬上成論詩絕句四十首從子淨名啓浣  
作注人謂不減向秀之注莊後不三十天卒西樵仲子

余在甓社湖舟中作歲暮懷人絕句六十首丙夜而畢紙盡以公牒牘尾續之淋漓皆徧

余少在濟南明湖水園亭賦秋柳四章一時和者甚衆後三年官揚州則江南北和者前此已數十家閨秀亦多和作南城陳伯璣允衡曰元倡如初寫黃庭恰到好處諸名士和作皆不能及

余在廣陵偶見成都費密

字此度

詩極擊節賦詩云

成都跋道士萬里下峨岷虎口身曾拔蠶叢句有

神大江流漢水孤艇接殘春

二句即密詩

十字須千古

胡爲失此人密遂來定交如平生懽



余在廣陵有蜀士投詩一卷余閱竟曰中惟樂府  
三篇最佳後二十年以詹事祭告南海至廣州見  
羅浮布衣陳恭尹元孝則三詩皆陳舊作蜀士竊  
取入行卷者也余笑謂陳曰一一鶴聲飛上天賴  
吾能辨之

余以戶部侍郎祭告西嶽游慈恩寺見塏上有二

絕句

題秦莊  
襄王墓

園廟衣冠此內藏  
野花歲歲上陵香

邯鄲鼓瑟應如舊  
嬴得佳兒畢六王  
問知爲郤陽  
康乃心太乙所作  
亟稱之翼日詩名徧長安而康  
不知也康以此得重名學使陸儼庭

德元

拔之充貢

賦是科以第五人冠其經

金壇潘高孟升五言學韋柳余愛其清真古澹謂

可與王言遠

庭

邢孟貞

昉

頡頏陳其年與余書云

有潘高者貧而工詩久別無可言者止此一物奉

獻潘有寒食一絕云黃鴉穀穀雨疎疎燕麥風輕

上鰲魚記得去年寒食節全家上冢泊船初

余最許石湖邢昉五言詩以爲韋柳門庭中人恨

未及友其人官祭酒時鄉人李某往令高淳余特

屬訪其子孫李至訪之則老妻穉孫煢煢孤寡饘

粥不給李脫贈三百金爲置腴田百畝其家竟不

知意出於余也。施愚山聞之，造余再拜曰：「某交孟貞三十年，不能卹其後人之窮。公與孟貞未定交，而能卹其身後，令不凍餓以死，某愧公多矣。至爲流涕。」

福清林古度，茂之萬曆中詩人，與曹南宮、學佺、鍾學憲、惺友善。亂後居金陵乳山，每過余，親爲撰杖，結襪。康熙甲辰，林攜其萬曆甲辰以後六十年詩詣余，求爲揀擇，僅存其甲子以前詩百餘篇。施愚山見之，曰：「吾交林翁久，不知其詩清新俊逸，源本六朝，初唐乃如此。」



南通州邵潛潛夫亦萬曆詩人錢宗伯牧齋亟稱之性孤僻凡數易妻晚竟無子僑居如臯年八十矣苦徭役余適以按部至縣詰旦首謁邵邵所居委巷乃屏輿從徒步而入邵曰適有酒一斗能飲乎余欣然爲引滿流連移晷始別縣令聞之立除其役

徐夜字東癡叔祖季木考功

象春

外孫與余兄弟爲

外從兄弟詩學陶韋巉剌處似孟東野余目之爲礪松露鶴西樵少有贈詩云美人自牧能貽我名士如蠅總附君余時尚羈紲亦有句云湘東品第

留金管江左風流續玉臺

余與邵潛夫陳其年諸名士以康熙乙巳脩禊冒  
辟彊水繪園分體賦詩余戲謂其年曰得紫雲捧  
硯乃可紫雲者冒歌兒最姝麗者爲其年所眷許  
之余坐湘中閣立成七言古詩十章後一日杜茶  
邨自廣陵至亦有補作或問之曰阮亭詩何如杜  
曰酒酣落筆搖五岳詩成笑傲凌滄洲君詩何如  
曰但覺高歌有鬼神誰知餓死填溝壑

蒲阪吳雯天章初至京師未知名余亟賞其詩謂  
爲仙才一日待漏朝房誦其句於葉文敏叅菴

方

云泉繞漢祠外雪明秦樹根濃雲溼西嶺春泥露  
條桑又門前九曲崑崙水千點桃花尺半魚葉大  
驚異下直即命駕往訪之吳詩名大噪都下所居  
永樂鎮即唐永樂縣有玉谿李義山家於此

余以順治庚子爲江南同考官得太倉崔華不雕  
工詩畫常有句云一寺千松內飛泉屋上行欹檣  
坐清晝薄冷出蘋間又谿水碧于前渡日桃花紅  
似去年時丹楓江冷人初去黃葉聲多酒不辭此  
例甚多余目爲崔黃葉又崑山王朱玉元式同出  
門下後官國子博士常有句云秋雨茂陵人獨臥



西風汾水雁還來。余時爲祭酒。題其後云。茂陵秋雨瀟瀟夜。愛爾哦詩四壁秋。多少長安苦吟客。瘦羊博士擅風流。

劉公弼

體仁

吏部善鼓琴。常於慈仁寺精舍彈御風。

操余贈詩云。與君更作他年約。黃鵠山頭訪戴行。京口黃鵠山。戴顓所居也。後五年果相遇。黃鵠山下。又沈文恪繹堂

荃

以箋索書。余爲書放翁詩云。

三疊淒涼渭城曲。數枝閒澹閬中花。未幾典蜀試。至閬中驛亭。恍然悟前詩。信數有前定哉。

余常夢中得詩云。谿流翡翠映煙空。谿上飛橋落。

彩虹愛玩花叢憶元相一枝渾臥碧流中既覺不  
知所謂及使蜀乃悟是元微之亞枝紅詩即使東  
川作也昭陽顧符真工畫余尤愛其棧道圖爲賦  
長歌凡扇頭絹幅屏幃間皆令作棧道圖後壬子  
丙子兩使蜀此其識也又常有夢中作云涼雲止  
復行水花開更落煙柳夕陽時蟬聲動高閣

諸城劉翼明字子羽居琅邪臺下老而工詩余常  
愛其句云桃花柳絮春開甕細雨斜風客到門

南海程周量

則可有詩

云朝行青山頭暮歇青山曲

青山不見人猿聲聽相續本是古詩余直刪作絕

句以爲有不盡之意程深服之又常言柳子厚漁翁夜傍西巖宿一首如作絕句以欸乃一聲山水綠結之便成高作下二句真蛇足耳而盲者顧稱之何耶

余客金陵居秦淮邀笛步上與主人丁翁談秦淮盛時舊事作絕句二十首人競傳寫虞山錢宗伯亦常居此有題石厓秋柳小景詩云刻露巉巖石骨愁兩株風柳曳殘秋分明一段荒寒景今日鍾山古石頭余繼和云宮柳煙含六代愁絲絲畏見冶城秋無情畫裏逢搖落一夜西風滿石頭袁蔣



菴于令見之笑曰忍俊不禁矣

虞山錢宗伯贈余古詩云騏驎奮蹴踏萬馬喑不驕勿以獨角麟儷彼萬牛毛又爲作集序有與君代興之語時余年甫踰弱冠耳其爲所賞異如此余後有絕句云少年薄技悔彫蟲拂拭當年荷鉅公紅豆莊前人去久花開花落幾春風

余少與彭少宰美門

孫通

友善後同官卿貳一日諸

公集朝房余問彭兄鄉中蓴菜風味何似彭畲云不知余笑曰應緣無蓴鱸之思是以不知其味彭與諸公皆大笑

余官刑部尚書一日閱爰書有名螃蟹者侍郎徐

公青來

潮

因言今歲津門蟹多而價廉余笑謂曰

公因紙上郭索遽思朶頤耶

此二則頤子雋味然与  
詩話至涉

蜀隆昌縣地名石谿橋有堊書一絕句云桃花依舊放山青隱几焚香對畫屏記得當年春雨後燕泥時汚石谿亭不著名氏

余於古人論詩最喜鍾嶸詩品嚴羽詩話徐禎卿談藝錄而不喜皇甫汈解頤新語謝榛詩說又云弇州藝苑卮言品隲極當獨嫌其黨同類稍乖公允耳

天啓中朝鮮使臣金尚憲字叔度由登州入貢鄒  
平張忠定公華東登延館之於家刻其詩一卷頗多  
佳句如三秋海岸初賓雁五夜天文一客星澹雲  
微雨小姑祠菊秀蘭衰八月時又過東方曼倩故  
里云夜開宣室儼珠旒執戟郎官走綠鞵首鼠轅  
駒俱碌碌漢廷綱紀一俳優蚤春云水際城邊野  
馬飛漸聞宮漏晝間稀東風日夜靡蕪綠塞北江  
南總憶歸王灘流水繞江涯江上松林是我家昨  
夜夢尋烏石路山前山後蚤梅花余論詩絕句云  
澹雲微雨云記得朝鮮使臣語果然東國解聲



詩康熙己未遣侍衛狼曠太學生孫致彌往朝鮮  
采詩大抵律絕居什之九古詩歌行畧見梗槩而  
已孫後登戊辰進士官翰林

余以順治乙未舉禮部戊戌始赴廷對一日期

集禮部新郎君皆在全椒吳玉隨國對大呼入曰此

中何者爲濟南王郎乎衆愕然余方跂脚榻上笑

曰君自辨之吳直前捉余臂曰此即是也衆爲一

笑後吳以第一甲三人及第假過真州贈余詩云

如此青天如此月兩人須問大江秋詩詳鑿江倡

和集

南昌重建滕王閣落成名流競爲賦詩推彭少宰  
美門擅場中聯云依然極浦生秋水終古寒潮送  
夕陽余常喜諷詠之謂劉文房郎君曾無以過也  
彭又題湖口句云湖光盡日依樓堞山色終朝滿  
縣城亦是寫照

竹枝古稱劉夢得楊廉夫近彭美門尤工此體如  
廣州竹枝云木縣花上鷓鴣啼木縣花下牽郎衣  
欲行未行不忍別落紅沒盡郎馬蹄半年水宿半  
山居冬采香根夏采珠珠好須從蚌中覓香燒還  
使博山鑪山陰徐緘伯調越中竹枝云勾踐城南

春水生。水中鬪鴨自呼名。伯勞飛遲燕飛疾。郎進  
城時儂出城。皆本色語也。汪鈍翁又擬葉水心作  
洞庭橘枝詞。

英陵漢武帝葬李夫人處。距茂陵數武。余過之。有  
詩云。長門買賦草萋萋。冤魄雲陽杜宇啼。惟有佳  
人解傾國。英陵長傍茂陵西。楊妃墓在馬嵬西北  
原上。余爲立小碣。題詩云。巴山夜雨却歸秦。金粟  
堆邊草不春。一種傾城好顏色。茂陵終傍李夫人。  
花林曠在雲門山南。益都山水佳處也。山泉翁詩  
云。山藏柳市無車馬。水隔桃源有子孫。馮宗伯北



御史壽光人文和公

珙之孫

東阿于慎思號龐眉生文定公慎行之兄詩才情過文定尤工古賦年始弱冠夭卒有龐眉生集若干卷

十七叔祖考功季木

象春原名象異

天才排冪目空一世

使秦游曲江有詩云韋曲杜陵文物盡眼中多少可兒墳題項王廟壁云三章既沛秦川雨入關更肆阿房炬漢王真龍項王虎王玦三提王不語鼎上梧羹棄翁姆項王真龍漢王鼠垓下美人泣楚

歌定陶美人泣楚舞真龍亦獵虎亦獵古今判劉

項無此雄快八叔祖郡丞伯石

象艮

亦有詩名五言

如蕭條兩岸柳悵悵五更雞魚藏蘆底穴雪壓竹

間蘆青熒茅舍火縹緲竹林煙孤城一飛矢六國

有心人龍源花外水鹿角雨中山皆中唐之選也

十八叔祖大寧令用晦

象明原名象履

詩亦有足傳如日

日輕雷送雨聲小窗歷亂竹枝橫水痕時落還時

漲枕上看山秋欲生細雨新晴百草菲含桃初染

杏初肥奚童競撲柳花落嬌鳥時銜榆莢飛水淨

欲浮蝌蚪字苔深爭迸籜龍衣闌珊春色歸何遽

簾外輕寒臘屐稀又有句云老松帶露滴巾角亂石欹風迎馬前余嘗輯爲琅邪三公集

先世父侍御府君

諱

與循字百斯崇禎中以効總

兵官鄧玘忤時相罷歸甲申聞國難闔門自經明

史載忠義傳有隴首集一卷南城陳伯璣錄其詩

與雁門

孫白谷

簫曲

黃海岸

鈴岡

袁臨侯

合刻之爲四忠

詩錢宗伯贊之曰遺音危苦孤桐玉律吟龍戛石

梵猿噉月浩歌悲嘯雷風交加蟲豸不蟄象華其

牙

云

杜于皇詠坡公云堂堂復堂堂子瞻出峨眉蚤讀



范滂傳晚和淵明詩龔端毅每誦之以爲二十字  
說盡東坡一生余因憶宋人一詩云東坡謫嶺南  
時宰欲殺之飽喫惠州飯細和淵明詩二作殆不  
易軒輊

邾縣全軌字車同博雅工詩常以長句寄余余賞  
之而嗟其貧老不遇爲之延譽於徐中丞張侍御  
遂聘主大梁書院未幾徐遷去張卒官而全以乙  
酉中河南解元

中牟南湖有蒲盧亭張孝廉林宗民表時飲酒於此  
余過之嫌其命名非雅易以墊巾以存林宗故蹟

題詩云南郭孤亭野水濱。菰蒲獵獵水鱗鱗。林宗  
未遠風流在。不愧亭名是墊巾。

鄭州夕陽樓。李義山有詩。余過之。題詩云野塘菡  
萏正新秋。紅蕩香中過鄭州。僕射陂頭疎雨歇。夕  
陽山映夕陽樓。

滁州西澗有野渡。菴取韋詩命名。余題詩云西澗  
蕭蕭數騎過。韋公詩句奈愁何。黃鸝喚客且須住。  
野渡菴前風雨多。又題清流關云。蕭蕭寒雨渡清  
流。苦竹雲陰特地愁。回首南唐風景盡。青山無數  
繞滁州。

蜀合江縣有西涼王神祠神是涼王呂光光苻秦  
時討李焉之亂至此因爲立祠放翁詩我雖不識  
神知是山水人不敢持笏來袒褐整幅巾蓋未詳  
其本末余過謁祠賦長句正之長安氏王頭有角  
東掃鄴宮西定蜀

云

詩載蜀道集

余謂陸魯望無情有恨何人見月白風清欲墮時  
二語恰是詠白蓮詩移用不得而俗人議之以爲  
詠白牡丹白芍藥亦可此真盲人道黑白在廣陵  
有題露筋祠絕句云翠羽明璫尚儼然湖雲祠樹  
碧于煙行人繫纜月初墮門外野風開白蓮正儼



其意一後輩好雌黃亦駁之云安知此女非嫫母而輒云翠羽明璫耶余聞之一笑而已

趙韞退按察官湖西有詩百餘篇余取其南康登樓一絕句云返照臨高閣寒煙澹澹分城空何所有一半是匡君

余論當代詩人目曰南施北宋施謂愚山宋謂荔裳二君集皆經余刪定又嘗取愚山五言近體詩爲主客圖一卷今施集尚存其家未能版行宋集經蜀亂失其本矣

余論古今雪詩惟羊孚一贊及陶淵明傾耳無希

聲在目。皓已潔。及祖詠終南陰嶺秀一篇。右丞灑  
空深巷靜。積素廣庭閒。韋左司門對寒流。雪滿山  
句最佳。若柳子厚千山飛鳥絕。已不免俗。降而鄭  
谷之亂飄僧舍密。灑歌樓。益俗下欲嘔。韓退之銀  
盃縞帶亦成笑柄。世人誅於盛名。不敢議耳。

梅詩無過坡公。竹外一枝斜更好。七字及雪後園  
林。才半樹。水邊籬。落忽橫枝。高季廸雪滿山中高  
士臥。月明林下美人來。亦是俗格。若晚唐認桃無  
綠葉。辨杏有青枝。直足噴飯。

又論杜八哀詩。最冗雜不成章。亦多吟藝語。而古

江氏誤行又云是說  
羽流才並賞且曰  
正傳洵名之古傳款  
行則主是也

今稱之不可解也以上三則信是其眼

湮鈍翁問余王孟齊名何以孟不及王奮曰孟詩  
味之未能免俗耳湮深嘆其言謂從無人道及此  
今日善學西崑者無如常熟吳及脩齡學才調集  
無如江都宗元鼎定九建昌楊思本因之太原趙  
瑾懿侯趙下橋絕句云東陽回首又天涯天步艱  
難國步賒一自下橋橋斷後王孫惆悵不歸家虎  
丘云綠陰濃護好樓臺獨懼扁舟月下來翹首楚  
天堪墮淚湛盧何處不重廻楊踏花明日值雨云  
折得花來不贈人膽瓶相對一枝春遙憐昨夜行



歌處落草霑泥倍愴神。怨詞云春草日夜綠。春鳥  
飛且鳴。感郎千金意。猶自覺愁生。

劉公馥常有絕句云。西湖小閣多晴月。好友同舟  
半是僧。寄語江南老桑苧。秋山紫巖憶行滕。自編  
其集遺之余。舉似云。如此作何以不錄。公馥笑謝  
曰。賴兄爲我作行秘書。

淮陰張養重虞山游荆東過廣陵謁余。揖甫罷。余  
亟問曰。夙愛足下。南樓楚雨三更遠。春水吳江一  
夜生。平生如此好句。復有幾張。退謂丘洗馬季貞  
象曰。夙昔快意之句。不意阮亭一見便能道出。

生字原亦作增。子一作  
改。乃誤。皆全矣。

西樵甲辰之獄吏議羅織鍛鍊半載始白扁舟南下余迎於秦郵相見持之而泣西樵都不及患難時事直取一巨編擲余前曰弟視吾詩境地差進不人嘆其曠達

汪鈍翁跋西樵阮亭手帖云子友新城二王相善也故藏其尺牘爲多得輒裝潢之時一展玩如聆其抵掌笑語中有一帖小異當是叔子筆耳謂東亭也初鈍翁在京師求友於余余爲言劉公馭梁曰緝程周量鈍翁遂皆與定交云

詞州亦不應入詩

河陽薛大武

奮生

與余輩爲同年生豪邁任俠一日

酒酣大言曰君輩文士耳異日終當依我幕下余  
熟視辟曰恨吾子非嚴鄭公一座大笑鈍翁賦詩  
云少日詞場偶擅名未曾縛袴學長征他年若得  
登三事但取蕭郎作騎兵

余最喜武林毛馳黃

先舒

詠西施絕句云別有深恩

酬不得向君歌舞背君啼此意未經前人道過

王士純字孤絳贈光祿寺少卿十二叔祖完初公

象役

之孫白皙美風姿書法李北海弱冠殉崇禎壬

午之難有新月詩云乍見一簾水回頭月抱肩黃  
如浮醪酒瘦比壓琴弦



余辛丑客秦淮作雜詩二十首多言舊院時事內一篇云十里清淮水蔚藍板橋斜日柳毵毵棲鴉流水空蕭瑟不見題詩紀阿男阿男名映淮詩人伯紫映鍾之妹也幼有詩云棲鴉流水點秋光後適莒州杜氏以節聞伯紫與余書云公詩即史乃以青鐙白髮之嫠婦與莫愁桃葉同列後人其謂之何余謝之後入爲儀郎乃力主覆疏旌其閭笑曰聊以懺悔少年綺語之過

康熙癸卯歲將除孫無言

默

欲渡江往海鹽訪彭

十美門人問有何急事畲曰將索其延露詞與阮

亭衍波程邛

鄒祇謨

麗農詞合刻之陳其年

維崧

贈以

詩曰秦七黃九自佳耳此事何與卿覲寒孫新安

人居廣陵

歷下詩派始盛於弘正四傑之邊尚書華泉再盛  
於嘉隆七子之李觀察滄溟二公後皆式微施愚  
山督學時爲滄溟立墓碑夢其衣冠來謝余刻華  
泉集及其仲子習遺詩又訪其後裔則墓祠久廢  
七世孫某已爲人家佃種矣乃公言於當道予以  
奉祀生兒童不識字耕稼魏公莊古今同慨也  
鄒平滄山灤獺水匯處煙波浩淼中有墨王亭是

從叔祖洞庭

象成

別業周侍郎櫟園過之賦詩見懷

云獨有墨王亭畔水空明與客憶王郎墨王見陸

友仁研北雜志

六合李侍郎敬字退菴順治末與余及長洲汪荅

文

琬

南海程周量

則可

論詩京邸其說甚精余極愛

其五言如酒醒亭午後人憶秣陵西又瓜步新添

水清明遠送行此例數十句皆不減古人辛丑歸

田舟過廣陵猶與余論詩移晷未幾病卒病中自

訂平生詩文若干卷刻之戒其子度閣二十年後

乃可印行今三十餘年矣余門人吳曷編脩其壻



帆船一誤是眉山  
句想云一時誤記  
耳

也屬索諸其子至再不可得今無有知其姓字者  
矣余嘗錄二十餘篇於感舊集將來或不盡湮沒  
者意在斯乎

南海耆舊屈大均翁山梁佩蘭藥亭陳恭尹元孝  
齊名號三君元孝尤清迴絕俗其詩如離憂在湘  
水古色滿衡陽帆隨南嶽轉雁背碧湘飛映花谿  
路閉漱水石根虛枕榔過雨垂空地瑤瑁乘潮上  
古城家山小別吟兼夢水驛多情浪與風之類皆  
得唐人三昧而平生游跡不出嶺南故知之者較  
少於屈梁尤工書法嘗以端石寄余手自篆刻云

獨漉所貽漁洋寶之獨漉元孝別號也

弇州云嘗見皇甫少玄百泉兄弟論詩五言以猿啼洞庭樹人在木蘭舟爲極則二句乃晚唐馬戴

詩

全詩云露氣寒光集潏潏下楚邱猿啼洞庭樹人在木蘭舟  
唐澤生明月蒼山夾亂流雲中君不見竟夕自懸秋

予所居小圃石帆亭南有池曰春草一日集子弟羣從賦詩弟士驪慢亭有天際星河倒入池之句予甚激賞之

杜茶邨濬初名詔先黃岡人僑居金陵貧甚屢客廣陵甲辰人日大雪時方鎖印無事余造訪之清言竟日乙巳七夕余北上京師諸人祖於禪智寺

即席賦五言茶村有句云記逢人日雪造我吟窮  
愁謂此也

先大父方伯贈尚書公年八十餘親教諸孫頗及  
聲律之學從叔祖洞庭先生善草書尤喜飲酒一  
日置酒邀之醉後顛墨淋漓公顧諸孫命對云醉  
愛羲之蹟余時年十一歲輒應聲曰閒吟白也詩  
公及洞庭先生皆大喜賜畫扇二

此則不必入

西山盧師巖有無名氏題詩云山僧汲空潭驚起  
二龍子十里雲濛濛三日雨不止

陸圻字麗京號講山武林耆宿爲西泠十子之冠



晚年遠遊不歸或云在嶺南爲僧釋名今龍或云  
隱武當爲道士終莫得而詳也洪昇昉思畬人絕  
句云君問西泠陸講山飄然一盃竟忘還乘雲或  
化孤飛鶴來徃天台雁宕間

近日釋子詩以滇南讀徹蒼雪爲第一如一夜花  
開湖上路半春家在雪中山如亂流落葉聲兼下  
聽徹寒扉不上關皆警句其弟子某亦有句云鳥  
啼殘雪樹人語夕陽山

盤山釋智朴有詩名余在京師日曾定其集嘗有  
句云木蛇鱗甲異俊鷄羽毛青亦未經人道語與

洪昇聯句云蒼松亂插連雲石石上苔痕虎行跡  
朴拄杖來從飛鳥邊下視蒼茫遠煙碧昇昇客武  
康有句云林月前後入谿花春夏開余亦嘗刪定  
其集云

雲南有地名板橋升庵題句云還如謝朓宣城路  
南浦新林向板橋曹能始學板橋詩云兩岸人家  
映桺條元暉遺跡草蕭蕭曾爲一夜青山客未得  
無情過板橋汴梁西三十里有板橋是白樂天題  
詩處

聞清林初文

章

孝廉古度之父也嘗有送人詩云

不待東風不待潮。渡江十里九停撓。不知今夜秦  
淮水。送到揚州第幾橋。以示梅禹金。鼎祚禹金激賞  
之。宣城有老儒丘華林。嘗以詩質禹金。但爲分句  
讀而已。見之大恚。曰。林詩二十八字。正得二十八  
圈。吾詩字數不啻倍之。乃不得一圈。耶。聞者笑之。  
同年祁珊洲。文友東莞人。爲廬江令。有詩云。一夜東  
風吹雨過。滿江新水長。魚蝦余深喜之。戲呼爲祁  
魚蝦。祁作色而怒。余笑謝曰。兄勿怒。此自有例。祁  
問何例。余曰。兄不聞梅河豚耶。祁乃失笑而罷。  
三朝北盟會編。載徽宗北狩至定武。金人高會擊



毬請帝賦詩曰錦裘駿馬曉棚分一點星馳百騎  
奔奪得頭籌須正過休令綽撥入斜門揮塵餘話  
載道君裡祀禮成再賜太師遲字韻詩云歸問雪  
中誰詠絮冥搜花底自巡簷佳句也

鄒平長白山醴泉寺即范文正公畫粥處四山環  
合一谿帶縈谿上有范公祠祠中多前代石刻有  
嘉靖十三年崧少山人張鯤八絕句最佳節錄於  
左危閣煙霞出峯簷麋鹿來春泉落西礀聲繞讀  
書臺風畫谿楊色煙春巖蕙香人言背絕壑纔是  
上書堂山護埋金窟泉通畫粥廚傳燈衣盍在曾

伴老龍圖靈刹羣峯合名祠半日游難逢浮海術  
易集下山愁鯤河南釣州人詩名不甚著而詩之  
工如此

姜白石詩說云僻事實用熟事虛用學有餘而約  
以用之善用事者也意有餘而約以盡之善措辭  
者也句中無餘字篇中無長語非善之善者也句  
中有餘味篇終有餘意善之善者也始于意格成  
于句字詩有四種高妙一曰理高妙二曰意高妙  
三曰想高妙四曰自然高妙一篇全在結句如截  
奔馬辭意俱盡如臨水送將歸辭盡意不盡若夫

意盡辭不盡剡谿歸櫂是也辭意俱不盡溫伯雪  
子是也一家之言自有一家風味如樂之二十四  
調各有韻聲乃是歸宿處撫仿者語雖似之韻則  
亡矣右論詩未到嚴滄浪頗亦足參微言

溫伯雪  
子目擊

而道存見莊  
子田子方篇

莊子宋元君將畫圖衆史皆至受揖而立舐筆和  
墨有一史後至僊僊然不趨受揖不立之舍使視  
之則解衣盤礴羸君曰可矣此真畫者也詩文須  
悟此旨

越處女與勾踐論劍術曰妾非受於人也而忽自



有之。司馬相如畲盛覽曰。賦家之心得之於內。不可得而傳。雲門禪師曰。汝等不記已語。反記吾語。異日裨販我耶。數語皆詩家三昧。

長洲尤悔菴

侗

工樂府蚤歲作讀離騷諸傳奇流

聞禁中遂達

世祖御覽嘆爲才子後

龍馭

升遐尤自北平罷歸。余寄詩曰。南苑西風御水流。殿前無復按梁州。飄零法曲人間徧。誰付當年菊部頭。尤爲泣下。

宋景文筆記詩。蕭蕭馬鳴。悠悠旆旌。顏之推愛之。昔我徃矣。楊柳依依。今我來思。雨雪霏霏。謝玄愛。

之訐謨定命遠猶辰告安石以爲佳語

又云左太冲詩振衣千仞岡濯足萬里流使人飄飄有世表意不減嵇叔夜目送飛鴻之語

又云莊生曰送君者皆自厓而返君自此遠矣讀至此令人蕭寥有遺世之意

余因思詩三百篇真如化工之肖物如燕燕之傷別籊籊竹竿之思歸蒹葭蒼蒼之懷人小戎之典制碩人次章寫美人之姚冶七次章寫春陽之明麗而終以女心傷悲殆及公子同歸東山之三章我來自東零雨其濛鶴鳴于垤婦嘆于室四章

之其新孔嘉其舊如之何寫閨閣之致遠歸之情  
遂爲六朝唐人之祖無羊之或降于阿或飲于池  
或寢或訖爾牧來思何蓑何笠或負其餼麾之以  
肱畢來旣升字字寫生恐史道碩戴嵩畫手未能  
如此極妍盡態也

謝公問王子猷云何七言詩畲曰昂昂若千里之  
駒汎汎若水中之鳧二語已盡歌行之妙是時七  
言作者未盛子猷又不以詩名而其言如此

淫鈍翁與余順治末稱詩都下忝齊名之目鈍翁  
有詩云俠少塲中同結駟郎官隊裏各題詩恥居



王後吾何敢願作雲龍上下隨

江行看晚霞最是妙境余嘗阻風小孤三日看晚  
霞極妍盡態頓忘留滯之苦雖舟人告米盡不恤  
也賦三絕句云彭澤縣前風倒吹三朝休怨隋帆  
遲餘霞散綺激江練滿眼青山小謝詩白浪空江  
斷去人連朝風色起青蘋小孤山外紅霞影定子  
當筵別是春蕭蕭寒雨暗潯陽日日江潮過馬當  
東望滄溟天萬里乘風欲渡赤城梁

建安徐爰又橫年八十介其友鄭山公侍郎以詩  
求余序滁州嚴爰治頊字素臣年八十五介余門

人吳翰林

曷

以其稗言集求余點定皆云待此蓋

棺計其年今皆餘九十矣書之以無負其數千里  
諛誣之意

朱

載震

字悔人楚潛江人詩特工五言嘗爲余作齋

前花木六詠最佳昔王筠爲沈約賦郊居十詠約  
曰此詩指物呈形無假題署今之視昔殆爲過之  
官石泉令卒於蜀甚可惜也

蕭子顯云登高極目臨水送歸蚤雁初鶯花開葉  
落有來斯應每不能已須其自來不以力搆王士  
源序孟浩然詩云每有製作佇興而就余生平服

膺此言故未嘗爲人強作亦不耐爲和韻詩也

施愚山游嵩山詩云翠屏橫少室明月正中峰十字令人擘結不盡

臨朐馮文毅

溥

題漢文帝幸代圖云漢帝當年歌

大風歡留父老樂融融誰知將相調和後更有君王讌賞同每飯未嘗忘鉅鹿故居猶自念新豐旌旗十萬雲中駕休擬登臺出塞雄

馮氏自問山先生

裕

起家進士以詩名海岱間有

四子惟健惟重惟敏惟訥皆有詩名惟敏兼工詞曲惟訥纂古詩紀風雅廣逸諸書有功藝苑惟重



之孫則文敏公琦也萬曆中以經術推重館閣文  
毅則惟訥之玄孫云

謝康樂石門詩凡二其一則登石門最高頂所謂  
晨策尋絕壁夕息在山棲者永嘉之石門也其一  
石門新營所住四圍高山迴谿石瀨所謂躋險築  
幽居披雲臥石門者匡廬之石門也桑喬廬山紀  
事最稱簡核然取前一首誤矣

香鑪峰在東林寺東南下即白樂天草堂故址峰  
不甚高而江文通從冠軍建平王登香鑪峰詩云  
日落長沙渚層陰萬里生長沙去廬山二千餘里

香鑪何緣見之孟浩然下贛石詩暝帆何處泊遙  
指落星灣落星在南康府去贛亦千餘里順流乘  
風即非一日可達古人詩祇取興會超妙不似後  
人章句但作記里鼓也

張吏部公選

九微

先生題余過江集云筆墨之外自

具性情登覽之餘別深寄託

余有寄懷錢唐吳寶厓

陳琰

二絕句云競說仙人萼

綠華紫金跳脫降羊家苧蘿溪上春無主一代紅

顏獨浣紗紫陌紛紛看牡丹車如流水從

去聲

金鞍

那知冰雪西谿路猶有梅花耐歲寒寶厓因屬禹

尚基

之鼎

寫西谿梅雪圖

吾郡楊太宰夢山先生

巍

五言冲古淡泊在高子

業季孟間如遠道令人愁  
況近單于壘秋風入鴈  
門羽書日三至微微霽  
景流天壤色俱素鄉心生  
塞草世事入秋風風雨樓  
煩國關山李牧祠閒將  
流水引夢與古人居雨響  
殘秋地城分不夜天石  
古苔生徧泉香麝過餘皆  
逼古作

鄧州彭禹峯方伯

而述

雄豪磊落陳同父一流人也

詩多軍中之作如戰壘荒城  
蒙段外華風邊月漢  
唐年白露蠻江凋木葉  
黃沙羯鼓下營州千盤路



吐○檳○榔○鳴○一○線○天○開○瑤○瑁○池○此○例○數○十○句○皆○有○磨○  
盾○橫○槩○之○風○

漁洋詩話卷上







